

NORMATIVA:

Orde do 6 de maio de 2016 pola que se regulan as bases que rexerán o procedemento de concesión de axudas para a posta en marcha de casas niño, parcialmente cofinanciadas polo Fondo Europeo de Desenvolvemento Rexional no marco do programa operativo Feder Galicia 2014-2020, e se procede á súa convocatoria en réxime de concorrencia competitiva para os anos 2016, 2017, 2018 e 2019. (DOG nº 96 do 23/05/2016)

OBXECTO:

Regular a concesión de axudas para a posta en marcha de experiencias piloto destinadas á atención de nenas e nenos de ata tres anos de idade, mediante o establecemento dunha casa niño, nos núcleos rurais do territorio da Comunidade autónoma de Galicia de menos de 5.000 habitantes en que non exista ningún outro recurso de atención continuada á infancia de ata tres anos de idade, e convocar as ditas axudas para a posta en marcha do proxecto piloto de casas niño durante os anos 2016, 2017, 2018 e 2019.

Características do proxecto piloto:

1. A casa niño ofrecerá unha atención integral e personalizada a nenos e nenas en idades comprendidas entre os 3 meses e os 3 anos.
2. Este proxecto desenvolverase con carácter gratuíto na modalidade de atención diúrna e de luns a venres durante todo o ano, agás os días festivos, e un mes cada doce, no cal a casa niño permanecerá pechada por vacacións.
3. O horario de atención será a determinar polo titular da casa niño, pero debe manterse en funcionamento ininterrompidamente durante todo o ano, polo que é necesario contar cunha persoa que substitúa a titular no caso de enfermidade ou algunha situación de emerxencia.
4. A atención prestada comprenderá o servizo de cociña (quentar alimentos), a hixiene dos nenos e nenas e o desenvolvemento de actividades de tipo educativo, como obradoiros e xogos e acompañamento no xogo libre. En todo caso serán achegados polas familias tanto o leite e alimentos xa cociñados como o material de hixiene (cueiros, toallíñas, cremas, etc).
5. As familias poderán levar os nenos e nenas un máximo de oito horas diarias nun horario flexible que se pactará co/a profesional que desenvolva o proxecto piloto. Tamén se pactará coas familias o mes, ou parte proporcional ao período de desenvolvemento do proxecto no suposto da anualidade 2016, en que a casa niño permanecerá pechada por vacacións.
6. Cada casa niño terá un máximo de cinco prazas e para os efectos desta orde as nenas e nenos con necesidades específicas de apoio educativo suporán dúas prazas, sen que poida haber, en ningún caso, máis dun neno/a con estas necesidades por casa.
7. Os nenos e nenas que acudan á casa niño deberán estar empadroados/as no concello en que esta se sitúe ou nun limítrofe onde non existan recursos de atención á infancia de ata tres anos de idade.
8. Para acceder ao financiamento previsto é necesario que se atenda un mínimo de nenos/as que, na primeira anualidade de desenvolvemento do proxecto piloto se

establece en tres, número mínimo que, por falta de demanda, poderá baixar a dous nas sucesivas anualidades.

Beneficiarias e requisitos

Tanto persoas físicas coma as cooperativas de traballo que reúnan os seguintes requisitos:

1. Estar en posesión ou contar, cando menos, cunha persoa socia que o estea, no caso de cooperativas, de calquera das titulacións que se recollen a seguir, ou equivalentes, ou da formación ou experiencia seguintes:
 - Técnico/a superior en educación infantil.
 - Grao en mestre/a de educación infantil/educación primaria.
 - Grao en pedagogía, psicoloxía ou educación social.
 - Diploma que acredite ter realizado o curso de formación integral ou o curso de formación complementaria para futuros/as profesionais das casas niño impartidos pola Xunta de Galicia.
 - Formación acreditada en áreas relacionadas coa atención á infancia e coidados infantís ou experiencia profesional acreditada neste ámbito.
2. Residir nun núcleo rural en que non exista ningún recurso de atención continuada á infancia de ata tres anos de idade, ou telo feito con anterioridade á posta en marcha da experiencia piloto (antes do 23 de xuño)
3. Dispoñer dun plan de actuación cos nenos/as para atender eventuais emerxencias que se poidan producir na casa niño.
4. Establecerse como empresaria/o autónoma/o ou constituír unha cooperativa de traballo.
5. Acreditar unha revisión médica anual.
6. Contar cunha vivenda nun núcleo rural en que non exista ningún recurso de atención continuada á infancia de ata tres anos de idade, ou dispoñer dela con anterioridade á **posta en marcha da experiencia piloto**.

A vivenda contará cos seguintes requisitos:

1. Sistema de calefacción con protección dos elementos calefactores.
2. Unha sala con iluminación e ventilación naturais e un mínimo de 4 metros cadrados por menor, distribuída e organizada con criterios de flexibilidade para dar resposta ás distintas necesidades das nenas e nenos de 03 anos.
3. Unha zona diferenciada para o descanso e a hixiene infantil e unha zona para a preparación, almacenamento e conservación de alimentos.
4. Elementos de protección: enchufes de seguridade con tapas protectoras, protectores de dedos nas portas, seguros de ventás, barreira de seguridade con porta e protección contra incendios (extintor).
5. Un mobiliario e equipamento básico para a atención das nenas e nenos que incluirá, como mínimo: cambiador de cueiros, berces, sabas, mantas, colchóns, contedor de cueiros, ouriñais, tronas, hamacas, adaptadores de inodoro e materiais didácticos e de xogo. En todo caso o mobiliario deberá carecer de arestas (con protectores ou bordes romos) e os materiais empregados nas paredes e nos pisos deberán ser ignífugos,

cálidos, lisos, non porosos, facilmente lavables e aptos para a súa desinfección. Nestes últimos deberá crearse unha superficie continua e antideslizante, axeitada para gatear.

Permanencia mínima da actividade empresarial subvencionada

Será de 3 anos, desde a data de posta en marcha do proxecto piloto ata o 31 de decembro de 2019, agás causas de forza maior.

Accións e gastos subvencionables/ axuda e cuantías:

1. Para a reforma e adaptación da vivenda destinada a servir de casa niño, e o seu equipamento e dotación material: subvención de ata o 100 % dos gastos elixibles, cun límite máximo global por casa niño de 15.000 euros.
2. Para a prestación da atención personalizada de nenos e nenas de 03 anos: achega económica de 19.600 €/ano.

Documentación:

1. Solicitud.
2. Copia do DNI ou NIE da persoa solicitante.
3. Copia da documentación acreditativa de estar en posesión de calquera das titulacións, da formación ou da experiencia requiridas.
4. Certificado médico oficial acreditativo do estado de saúde.
5. Memoria descritiva en que se recolla a localización xeográfica e o número potencial de nenas/os usuarias/os e se xustifique a súa necesidade e oportunidade, apoiada na análise da contorna e nos datos oficiais de poboación publicados polo IGE dos últimos tres anos.
6. Proposta pedagóxica básica asinada pola/s persoa/s que desenvolverá/n o proxecto piloto.
7. Descrición do equipamento e materiais que se empregarán no desenvolvemento do proxecto (características e composición).
8. Plano da vivenda acompañado de fotografías de todas as estancias coa proposta das adaptacións que se realizarán, de ser o caso.
9. Plan de actuación cos nenos/as ante unha emerxencia durante o desenvolvemento do proxecto piloto.
10. Orzamento desagregado dos gastos de investimento (anexo III).
11. Certificación negativa do Rexistro central de delincuentes sexuais, só no caso de non autorizar a súa consulta.
12. Declaración de axudas en que consten expresamente as axudas de minimis solicitadas ou concedidas nos últimos 3 exercicios fiscais (anexo V).
13. Documentación acreditativa da inscrición ininterrompida na oficina de emprego como demandante de emprego durante 12 ou máis meses, de ser vítima de violencia de xénero ou do grao de discapacidade, de ser o caso. A acreditación do grao de discapacidade, só no suposto de non autorizar a súa consulta. Considerarase interrompida a demanda de emprego se se traballou durante un período acumulado de 90 ou máis días nos 365 anteriores á data de solicitude.

14. Xustificante de empadramento da persoa solicitante ou da que vai desenvolver o proxecto piloto no suposto de cooperativas de traballo asociado, no caso de que non autorizase expresamente a súa consulta.
15. Alta na Seguridade Social no RE de autónomos no suposto de persoas físicas, só no caso de denegar expresamente a súa consulta, ou afiliación da entidade e de cada unha das súas persoas traballadoras na Seguridade Social no caso de cooperativas de traballo asociado.
16. Alta no IAE ou, se é o caso, alta no censo de obrigados tributarios do Ministerio de Facenda e Administracións públicas, só no caso de denegar expresamente a súa consulta.
17. Documentación acreditativa da dispoñibilidade da vivenda durante o período subvencionado (escritura de propiedade, contrato de arrendamento, documento de cesión etc.).
18. Plano da vivenda acompañado de fotografías de todas as estancias coas adaptacións realizadas.
19. Informe sobre a habitabilidade da vivenda dos servizos municipais correspondentes.
20. Datos de identificación da persoa que se encargará de substituír a responsable do desenvolvemento do proxecto piloto nos supostos de ausencia, enfermidade ou emerxencia, así como orixinal ou copia cotexada da documentación recollida no artigo 4.1.a).
21. Xustificante de ter contratada unha póliza de seguro que cubra as continxencias de responsabilidade civil, danos a terceiras persoas e accidentes durante o desenvolvemento da actividade subvencionada.

Prazo de presentación das solicitudes:

O prazo de presentación das solicitudes será dun mes contado a partir do día seguinte ao da publicación desta orde no Diario Oficial de Galicia. ÚLTIMO DÍA O 23 DE XUÑO